

Мұхтар Әуезов атындағы Оңтүстік Қазақстан университеті колледжінің ұйымдастыруымен болашақ талапкерлерге арналған «Ашық есік» күні өткізілді. Оған аталмыш оқу орнының оқытушылары, студенттер, ата-аналар мен бір топ мектеп оқушылары қатысты.




«Ашық есік» күні өтті

Іс-шараны колледж директоры, тарих ғылымының докторы Сейдехан Әлібек ашты.

– Студенттік шақ – адам өмірінің алтын дәуірі, ең жарқын ұмытылмас сәттері екені даусыз. Осы орайда жастар қауымы мамандық, дос және жар таңдауда қателеспеу керектігін баса айтар едім. Мамандық таңдау – өте жауапты әрі маңызды іс. Бұл мәселеде әр адам ең алдымен өзінің қызығушылығына, қабілетіне, бейімділігіне, қалауына сүйенуі керек. Колледжімізде жас ұрпаққа сапалы білім мен саналы тәрбие беру жолында барлық жағдай жасалған. Студенттерге ең білікті ұстаздар дәріс береді. Сан түрлі үйірмелер жастардың жан-жақты жетілуіне ықпал етеді. Қысқасы, студенттерге қоғамдық жұмыстарға белсене қатысу арқылы білімі мен білігін шыңдауларына болады, – деді Сейдехан Әлібек.

Іс-шара барысында ТМД студенттерінің арасында өткізілген байқауда жеңімпаз атанған колледжіміздің тамақтандыруды ұйымдастыру және бағдарламалық қамтамасыз ету мамандығының I курс студенті Асият Көкшен мектеп мұдирі Әділби Жолдасбайға арнайы куәлік, төсбелгі табысталды.

Дана халқымызда «Ұстазы жақсының – ұстанымы жақсы» деген ұлағатты сөз бар. Колледжде өгемен еліміздің көк туын әлемдік деңгейде желбіретіп жүрген өнегелі жастар өте көп. Солардың бірі – дене тәрбиесі және спорт мамандығының III курс студенті Аяжан Ергентай. Ол 2021 жылы «UNIFIGHT» әмбебап жекпе-жектен өткен әлем чемпионатында «классика» версиясы бойынша чемпион, ал, «лайт» версиясы бойынша қола жүлдегер атанған. Ресей Федерациясының Анапа қаласында спорттық пышақ лақтырудан өткен әлем чемпионатында қола медаль иеленді. Бол-



гарияның астанасы, – Софияда «ММА» аралас жекпе-жектен өткен әлем чемпионатында үздік үштікке кірді. Украинаның Харьков қаласында панкратионнан өткен әлем чемпионатында да үшінші орын иеленді. Оның бұдан басқа да жетістіктері аз емес.

Осы мамандық бойынша II курста оқитын Дастан Наширепов батуттық гимнастикадан өз құрдастарының арасында Қазақстан чемпионы атанып отыр.

Бастауыш білім беру педагогикасы мен әдістемесі мамандығының II курс студенті Аяжан Тоқтамысұлы кекушинкай каратеден «Шахтер» кубогында екінші орын еншіледі. Түркістан облысының екі дүркін чемпионы.

Ақпараттық жүйелер мамандығының IV курс студенті Қайырхан Кемелхан – қазақ күресінен, дзюдо, самбодан өткен бірқатар халықаралық жарыстардың жеңімпазы. Бағдарламалық қамтамасыз ету мамандығының II курс студенті Ерасыл Ғалымжанұлы – қазақ күресі, дзюдо, самбодан спорт шеберлігіне үміткер. Азия кубогының қола жүлдегері.

М.Әуезов атындағы ОҚУ колледжінің волейболшы қыздар

командасы Шымкент қаласындағы арнаулы орта оқу орындары арасында өткен спартакиаданың қос дүркін жеңімпазы атанып, республикалық жарыстарда бағын сынап жүр.

Ветеринария мамандығының I курс студенті Сержан Мәделі 2022 жылы көкпардан облыстық жарыстың жеңімпазы, 2023 жылы Қазақстан чемпионы атанған. Қостанай қаласында өткен республикалық жарыста ең үздік шабуылшы деп танылған. Дене тәрбиесі және спорт мамандығының I курс студенті Аймарап Әскенова таэквондодан Алматы, Шымкент, Астанада өткен республикалық жарыстарда топ жарған. 2022 жылы Байқоңыр қаласында өткен халықаралық жарыстың жеңімпазы атанған. Таэквондодан қара белбеу иегері.

«Ашық есік» күні аясында пән оқытушылары – Әлия Ахметова, Айгүл Сәбденованың жетекшілігіндегі студенттер өз қолдарымен тіккен өнер туындыларын жұртшылық назарына ұсынды. Сахнада дефиле көрсетілді.

М.Әуезов атындағы ОҚУ колледжінің түлегі, WorldSkills Kazakhstan 2022 республикалық чемпионатында «Ұшқышсыз ұшу аппараттары» құзіреттілігі бойынша жеңімпаз атанған, бүгінде осы арнаулы оқу орнының білікті маманы Муаххид Абдрахимов сөз сөйлеп, талапкерлерді үздік оқумен қатар, ізденіспен еңбек етуге де шақырды.

Қарлығаш ҮСЕНҚҰЛОВА,
Мұхтар Әуезов атындағы
Оңтүстік Қазақстан
университеті ақпараттық
білім орталығының
кітапханашысы, ОҚУ
колледжінің
оқытушысы.